

COMUNICATO n. 753 del 09/04/2024

Traduzione in ladino

APSP, l'assessor Tonina l'é jit te la strutures de Fascia, Fiem e Cembra

[Ladino] Va inant l'lurier de scout del assessor provinzièl a la sanità, politiches sozièles e cooperazion, Mario Tonina te la Apsp del Trentin. En mèrtesc ai 2 de oril l'é jit te Fascia, Fiem e Cembra, co la vijita te l'Apsp de Fascia de San Giovanni di Fassa-Sèn Jan, te l'Apsp San Gaetano de Pardac, te la Cèsa de Paussa Giovanelli de Tieser e te la RSA de Lisignago.

“L'é stat scontrèdes spetèdes e utoles, olache é podù scutèr la ousc de chi che duc i dis laora e rencura noscia jent de età e che à podù portèr dant i besegnes e la costions che ge vel scomenzèr a fèr fora— chest l'é chel che à dit l'assessor Tonina-. Rebadescie mie empegn, co se arà binà su duc i elemenc, de troèr soluzions da meter a jir, che tegne cont de la mudazions en esser te noscia sozietà, dantaldut l'smendrament di nascimenc e la popolazion che doventa più veia, per proèr a fèr vèlch de concret per l'ben de la jent de età de anché, de doman e più en generèl, de la families”, à dit amò Tonina.

Col assessor, fora per la cèses de paussa de Fiem, Fascia e Cembra, l'era Sonia Chiusole, assistenta sozièla del Ofize del assessorat a la Sanità, politiches sozièles e cooperazion, Marcello Guidi del Servije politiches sanitàres e per chi che no pel per se. Per l'Azienda Provinzièla per i Servijes Sanitàres l'era la diretora per la integrazion sozio sanitàra Elena Bravi, l'diretor per l'suport clinich de endrez de la cèses de paussa Sergio Minervini e l'Diretor del Distret Est Enrico Nava.

Personal calificà, pos let, patologie dalbon ries di ghes e besegn de meter a jir desvaliva formes de suport e assistenza no demò te la RSA, chisc l'é i problemes che à portà dant duta la strutures endèna la scontrèdes.

“L'é argomenc che à de besegn de n'lurier de sistem e trasversèl fat da più assessorac, de na colaborazion istituzionèla a più livie e partezipazion ativa del volontariat sozièl, de la comunità e ence del privat”- à dit amò Tonina.- “Bensegur l'tem del personal l'é emportant, e la soluzion l'é n'recognosciment economic adatà, ma no demò. En cont de duta chesta costions, ti meisc che vegn proaron a ge dèr responetes prezises a ogne realtà aldò di besegnes specifich porté dant, ma ence a fèr consciderazions più de sistem e de prospetiva da spartir con duc i referenc de la strutures”.

Te la pruma scontrèda stata da bonora, la delegazion reta dal assessor Tonina la é stata a San Giovanni di Fassa-Sèn Jan. À tout dant la Presidenta de l'Apsp Barbara Bravi e la diretora, Elisa Emiliani, l'Ombolt de San Giovanni di Fassa-Sèn Jan Giulio Florian, l'CdA del ent e dotrei raprezentanc di ghes. Endèna la vijita l'assessor Tonina à vedù la strutura che ge dèsc alberch a sessanta ghes e che l'an passà à fat festa per l'vintisem cedeand de atività. La presidenta e la diretora ge à dat luster ai elemenc de prijie de la strutura e i ambic sun chi che se cognessa entervegnir, scomenzan da dotrei operes de miorament e de modernament. A livel de endrez, l'é stat portà dant l'problem de troèr personal calificà e la logazion periferica, ensema col besegn de proèr a sporjer servijes de enjonta e de integrazion respet a chi residenzièi.

Tonina do l'é jit te l'Apsp San Gaetano de **Pardac**, olache l'é stat tout dant dal President Renato Cemin, dal diretor Maurizio Belloni, dai comembres del CdA, dal ombolt f.f. Giovanni Aderenti. À tout pèr ence i raprezentanc del volontariat e di ghes, che anchecondi i é passa 80. Chiò l'é sutà fora la gran emportanza de aer na comunanza che stèsc apede, ajache la cèsa de paussa la é tel zenter del paisc, e soraldut l'é stat valorisà l'ruolo del volontariat, dalbon atif e che l'fèsc acioche la sojornanza te la cèsa de paussa la sie più piajegola.

L'é stat sottrissà l'emportanza de la prevenzion, de tor ite i joegn te percorsc per tor consaputa del valor che à engaissèr i manco joegn a esser atives, del esser jent de età e del volontariat te chisc ambic.

A **Tieser**, l'assessor Tonina à scontrà chi che rec la cèsa de paussa Giovanelli, strutura che tol dant presciapech 70 jent. L'president Giovanni Zanon e la diretora Roberta Bragagna à portà dant la situazion de la strutura e la endesfides a cheles che l'CdA cogn ge fèr front. Dantaldut l'é stat recordà la veia strutura, che dal 2017 la vegn durèda pech e sun chela che l'é stat domanà de se fèr n pensier adum co la Provincia per poder la valorisèr miec che l'é meso aldò di besegnes del teritorie, ma ence la fadia a troèr infermieres, e chesta mencianza fèsc doventèr senestra no demò la gestion ordenèra, ma ence la programazion. À tout pèr a la scontrèda estra che l'CdA de la cèsa de paussa ence l'assessor de comun Marisa Delladio, i raprezentanc de la Magnifica Comunità de Fiem e di parenc di ghes e l'coordenament di servijes sanitàres de la strutura.

Se à serà chesta dì co la vijita a la Residenza Sanitàra Assistenzièla de Lisignago che la é de la Comunità de Val. A tor dant l'assessor Tonina l'era l'president de la Comunità de Val, Simone Santuari e la Ombolta de Cembra Lisignago, Alessandra Ferrazza, apede a la pèr gestionèla co la presidenta de Spes – la coprativa sozièla che gestesc la strutura – Paola Maccani, l'Diretor generèl, Italo Monfredini e l'diretor de la strutura, Manuela Demaria.

L'assessor Tonina à despiegà che “per poder pissèr a de neves percorsc ge vel che ge vegne fat front a chisc argomenc al scomenz de la legislatura, per perveder politiches che vae envers al davegnir. Per chest l'Trentin, ence aldò de sia storia de Autonomia, l'cogn se tor fora de anter per proèr de neves modie e ge arsecurèr servijes de calità a chi che te chest moment à più de besegn e che ge à dat l'met al Trentin de esser chel che l'é ades”.

La Rsa de Lisignago la tol dant 74 jent. L'é stat sottrissà che la gestion de la Rsa de Lisignago l'é na soluzion che garata ence de gra al zenter per l'dì che tol dant vint jent de età te la strutura de la Rsa, e a la colaborazion percacenta co la Comunità de Val.

Drucan [chest link](#) se pel desiarièr images e intervista
L'intervista al assessor Mario Tonina

https://www.youtube.com/watch?v=O2_sAp3C95Q

La images de la scontrèdes

<https://www.youtube.com/watch?v=Dg-6-rR0lSQ>

Traduzion di Servijes Linguistics e Culturèi del Comun general de Fascia

(cdt)